

2 KAWRIN

(The Second Epistle of Paul to the Corinthians)

Lawk karouknae

¹ Kai Pawl, Cathut ngainae lahoi Jisuh Khrih e guncei lah kaawm e, hoi ka nawngha Timote ni Kawrin kho kaawm e Cathut e kawhmoun hoi Akhaia ram pueng dawk kaawm e tami kathoungnaw koe ca na patawn awh.

² Maimae Pa Cathut koehoi Bawipa Jisuh Khrih koe e lungmanae hoi roumnae teh nangmouh koe awm lawiseh.

Lungpahawikung Cathut

³ Maimae Bawipa Jisuh Khrih e Pa Cathut pahrennae hoi ka kawi e maimae na Pa, kabawmkung Bawi lah kaawm e Cathut teh yawhawinae awm lawiseh.

⁴ Maimouh ni reithainae a phunphun khang awh navah, lung na pahawi awh. Bangkongtet-pawiteh maimouh ni coe awh e lungpahawinae hoiyah reithainae aphunphun kakhangnaw hah lungpahawi thai nahane doeh.

⁵ Hote Khrih ni a khang e reithainae teh moipap dawkvah, Khrih kecu dawk maimouh ni coe e lungpahawinae hai moipap van.

⁶ Maimouh ni reithai patang khang awh pawiteh nangmouh lungpahawinae hoi rungngangnae doeh. Kaimouh ni hawinae ka hmu awh e hai nangmouh ni hawinae na hmu awh nahane

doeh. Hote hawinae teh kaimouh ni ka hmu e reithainae koe nangmouh ni lungdonae hoi khang thai nahan thaonae lah ao.

⁷ Hatdawkvah nangmouh koe ka ngaihawinae a cak. Bangkongtetsawiteh, nangmouh ni reithai khangnae na phukhai e patetlah ahawinae hai reirei na khangkhai awh, tie ka panue awh.

⁸ Hmaunawnghanaw, Asia ram vah kaimouh koe runae ka phat e hah, nangmouh panuek laipalah o sak han ka ngai hoeh. Kaimouh ni a rucatnae khang thai hoeh totouh ka kâhmo awh dawh hring hane patenghai ngaihawinae awmhoeh.

⁹ Kaimouh due han totouh lawk a tâtueng awh toe telah ka panue. Hatei telah bout onae teh kaimouh ni mahoima kâuepnae tho laipalah kadoutnaw kathâw sakkung, Cathut kângue nahane doeh.

¹⁰ Cathut ni hettelah e taki kaawm e duenae koehoi kaimouh na hlout sak. Hmalah hai bout na hlout sak han telah Bawipa dawh ka ngaihawi.

¹¹ Nangmouh ni hai ratoumnae hoi kaimouh hah na kabawp teh, taminaw e ratoumnae dawh kaimouh ni ka hmu awh e poehnonaw khet navah, taminaw ni kaimae yueng lah lunghawinae lawk a dei awh han.

Kathounge panuenae lungthin

¹² Kaimouh ni kâoup kawî e teh talaivan lungangnae laipalah Cathut e lungmanae dawh Cathut koehoi ka tho e lungthin thoungnae hoi kahring awh e hah lawkpanuesaknae lung ni na panue sak.

¹³ Kaimouh ni nangmouh koe ca ka thut awh navah, nangmouh ni na touk thai hane hoi na thai thai nahane hloilah alouke ka thut hoeh.

¹⁴ Atuvah nangmouh ni kaimouh be na panuek awh hoeh ei, maimae Bawipa Jisuh e hnin nah kaimouh teh nangmouh hanlah kâoupnae lah na o awh e patetlah, nangmouh hai kaimouh hanelah, kâoupnae lah na o awh e hah na panue awh han telah ka ngaihawi.

¹⁵ Hettelah mangkhak katang dawkvah nangmouh teh hawinae bout na coe awh hanlah nangmouh koe ahmaloe ka tho han telah ka kâcai.

¹⁶ Nangmouh koe lah ka cei vaiteh Masidonia ram lah ka cei hnukkhu, haw hoi nangmouh koe ka tho vaiteh, Judah ram totouh nangmouh ni na thak a han telah ka pouknae ao.

¹⁷ Hottelah ka kâcai e heh a vanlong lah ka pouk e maw. Hoe pawiteh talai ngainae dawkvah ka titeh, Oe teh Oe hoi, nahoehteh nahoehtelah ka tet boi e na maw.

¹⁸ Cathut teh yuemkamcu e patetlah nangmouh koe ka dei awh e lawk teh vai touh daw, bokheiyah hoi, nahoehtelah nahoehmaw.

¹⁹ Kaimouh hoi Silvanas, Timote tinaw ni nangmouh koe ka dei awh e Cathut Capa Jisuh Khrih daw, vai touh hoi, Oe hoi Oe nahoehtelah awm laipalah Bawipa daw, Oe telah doeh ao.

²⁰ Hote Bawipa daw Cathut e a lawk kam e naw pueng teh maimouh kecu daw a bawilenna a kamnue nahanlah, Oe telah ati, Amen telah ati.

²¹ Nangmouh hoi kaimouh teh Khrih thung na o sak teh satui kaawikung teh Cathut doeh.

²² Hote Cathut ni maimouh hah tacik na kin teh maimae lungthung vah lawkawm lah Kathoung Muitha na poe toe.

²³ Cathut teh kai kampangkhai e lah ao. Ama ni ka lungthin teh a panue. Kawrin kho lah cei hoeh nahan kho ka pouk teh nangmouh hane malam ka pouk dawk doeh.

²⁴ Kaimouh ni nangmae na yuemnae dawk kê ka tawn awh hoeh. Nangmouh ni lunghawi nahanlah nangmouh hoi cungtalah thaw ka tawk awh e doeh. Nangmouh teh yuemnae hoi na kangdue thai awh toe.

2

¹ Hatdawkvah, kai nangmouh koe ka tho navah, nangmouh lungmathoe sak hanelah ka tho hoeh telah lawk ka tâtueng.

² Bangkongtetsawiteh, kai ni nangmouh lung na mathout sak pawiteh, kai kecu dawk a lung ka mathout e hloilah, apinimaw kai lung na hawi sak thai han va.

³ Kai ka tho navah, ka lung na kahawi sak e taminaw koe lungmathoenae sak hoeh nahanelah ca na patawn e doeh. Kai ka lung hawinae teh, nangmouh na kaawm e naw pueng lunghawinae lah ka tho han telah nangmouh abuemlahoi kêkuen lah kai ka yuem teh ka lung a kuep toe.

⁴ Nangmanaw lungmathoe sak hanlah tho laipalah, nangmouh na tak dawk lungpatawnae ka tawn e hah na panue thai nahanelah, lungmathoe, lung reithai, mitphi vailong hoi nangmouh koevah ka thut e doeh.

Ngaithoum lah kaawm e tamikayon

⁵ Lungmathoenae katâcawtsakkung ni lungmathoenae a tâco sak navah, kai ka tak dawkw tâco sak e tho laipalah nangmanaw abuemlah dawkw doeh lung a mathoe sak awh.

⁶ Tami moikapap ni reknae teh, ahni hanelah a khout toe. Ama e a yonnae ngaithoum hane hoiyah,

⁷ lung na pahawi hanelah ao, a lung hloi mathout pawiteh a lungpout langvaih.

⁸ Hat dawkvah nangmanaw ni ahnimouh koe lungpatawnae na kamnue sak nahanelah nangmanaw kai ni na kê awh.

⁹ Nangmanaw teh bangpueng dawkw lawk na ngâi ou, ngai hoeh ou ti panue nahanlah nangmanaw tanouk hanelah hoiyah hote ca teh kai ni na patawn awh e a tho.

¹⁰ Nangmouh na ka ngaithoum e hah kai ni hai ka ngaithoum van. Kai ni buetbuet touh ka ngaithoum pawiteh nangmouh hanelah Jisuh Khrih hmalah ka ngai thoum e doeh.

¹¹ Hoehpawiteh Setan ni na tâ langvaih tie ngaihrinae ao. Maimouh teh ahnie a kêcainae naw hah panue awh.

Masidonia lah a ceinae

¹² Kai teh Khrih kamthang kahawi pâpho hanelah Troas khovah Bawipa ni takhang na paawng pouh eiteh,

¹³ ka nawnggha Titu ka hmu hoeh dawkw ka lung nawm hoeh, ahnimanaw kut kaman hnukkhu, Masidonia ram lah ka ceitakhai.

Due hoi hring rahak thaw tawknae

¹⁴ Maimanaw teh Khrih thung tânae pawī pou to thai nahanelah, hote Bawipa panuenae hmuitui hah maimouh lahoi kho tangkuem koe, kâkahei thai nahanelah ka sak pouh e Cathut lungmanae teh pholennae awm naseh.

¹⁵ A lamthung teh maimouh teh rungngang lahun e naw hoi kahmat e naw koe Cathut hmalah Khrih e hmuitui lah o awh.

¹⁶ Kahmatnaw hanlah duenae koe a ka phat sak e duenae hmuitui lah ao teh rungngang lah kaawmnaw hanelah teh hringnae hmuitui lah ao. Hat boipawiteh hetnaw heh api hoi maw a kamcu.

¹⁷ Cathut e lawk pakhuppathan e taminaw patetlah maimouh ni dei hoe h niteh, Cathut ngainae patetlah lungthin kathoung hoi Cathut hmaitung vah Khrih thung pâpho aw h.

3

Hringnae na kacoesakkung canaw

¹ Hottelah dei aw h navah, mahoima kâphokâlennae lah maw o aw h han. Hettelah nahoe h pawiteh, maimouh ni alouknaw patetlah ayâ ni lungkuepkhai e, nahoe h pawiteh, nangmouh ni lungkuepkhai e ca hah a panki maw.

² Nangmouh teh kaimae lungthung thut lah kaawm e, tamipueng ni a touk aw h teh a panue aw h e, kaimae ca lah na o aw h.

³ Nangmouh teh kaimouh ni thut lah kaawm e Khrih e ca lah na o aw h tie hah a kamnue. Hote ca teh cahang hoi thut e nahoe h, kahring e Cathut e Muitha lahoi thut lah ao teh, lungphen

dawk laipalah, tami e lungthin dawkvah thut e lah ao.

Pawl e thouthainae

⁴ Maimouh ni Cathut hmalah Khrih kecu dawk hoi hot patetlah e yuemnae teh tawn awh.

⁵ Hatnavah, maimouh teh mae bahu lahoi ma ngainae patetlah hno buetbuet touh pouk teh sak thai e nahoe. Cathut kâuep laihoi sak thai e doeh.

⁶ Cathut ni maimouh hanlah lawkkam katha e thaw tawk sak thai nahanlah thaonae na poe. Hote lawkkam katha teh thut e kâlawk nahoe, Muitha hah doeh. Thut e kâlawk ni teh duenae a tâcokhai. Hatei, Muitha ni teh hringnae a thokhai.

Lawkkam katha thaw tawknæ

⁷ Lungphen dawk thut e duenae hoi kâkuen e kâlawk patenghai yah, bawilennæ hoi a tho teh, Mosi e minhmai dawk hoi ka tâcawt e kahmatthaie bawilennæ dawkvah Isarelnaw ni ahnie minhmai hah khen thai awh hoe pawiteh,

⁸ Muitha thawtawknæ teh banghloine bawilennæ hoi hoe a kawi han.

⁹ Hatdawkvah, yonphukhangnae dawk patenghai bawilennæ awm pawiteh, lannæ thaw dawk hane natawng teh banghloimaw hoe bawilennæ ao han.

¹⁰ Atanglah, yampa kaawm e bawilennæ hah atu e bawilennæ ni bang hoe lah a coung sak.

¹¹ Dongdeng hane dawk patenghai bawilennæ awm pawiteh, a yungyoe han dawk natawng teh hoe ao han.

¹² Maimouh teh hete ngaihawinae ao dawkvah, taranhawinae hoi tawk awh.

¹³ Mosi ni angnae a roum hnukkhu, Isarelnaw ni ka minhmai khen langvaih ati teh lukkarei hoi a minhmai a ramuk e patetlah maimouh teh awm awh hoeh.

¹⁴ Ahnimae a lungthin teh puenghoi a pata dawkvah sahnin totouh lawkkam karuem touk awh navah, hote lukkarei teh pou a ramuk lah ao awh. Bangkongtetpawiteh, Khrih lahoi dueng doeh hote lukkarei teh takhoe thai.

¹⁵ Sahnin totouh Mosi e Cakathoung a touk awh navah ahnimae lungthin teh hote minhmai huemnae lukkarei ni a ramuk pouh rah.

¹⁶ Hateiteh, Bawipa koe lah a kamlang awh toteh, hote minhmai ramuknae lukkarei teh takhoe lah ao han.

¹⁷ Bawipa ti navah Muitha doeh deingai nah. Bawipa e muitha aonae koe hloutnae ao.

¹⁸ Maimouh pueng ni minhmai ramuknae hawng a vaiteh, hlalang kâkhet e patetlah Bawipa e bawilennaeh heh khet awh vaiteh, Muitha lawkkam e Bawipa ni raeng a patoun e patetlah a bawilennaeh dawk meilam kâthungnae teh coe awh.

4

Yuemnae lahoi hringnae

¹ Hatdawkvah, maimouh teh a pahrennae coe e lahoi thaw tawk e lah o awh dawkvah, ka lungpout a hoeh.

² Maimouh ni arulaoi kaya ka tho e hnosakenaw pahnawt awh. Huenghai awm awh hoeh. Cathut lawk hai tami dum nahanlah pâpho a hoeh. Lawkkatang doeh kacairoecalah pâpho

awh. Hottelah hoi Cathut hmalah, taminaw e thoehawi panuenae lungthin dawk mamouh hoi mamouh kamnue sak awh.

³ Maimouh ni pâpho e kamthang kahawi heh, ramuk lah awm pawiteh, rawknae dawk kaawm lahun e naw koe doeh ramuk lah awm tih.

⁴ Ahnimouh hoi ka kâkuen lah dei han tet-pawiteh, Cathut e meilam lah kaawm e Khrih e bawilennae hoi kahawi e kamthang kahawi angnae hah, a hmu thai awh hoeh nahanlah het talai ka uk e cathut ni kayuemhoehnaw a lungmit a dawn sak pouh.

⁵ Bangkongtetpawiteh, maimouh ni mamae kong pâpho a hoeh. Khrih teh Bawi lah ao tie pâpho awh. Kaimouh roeroe heh Khrih hanlah, nangmae san lah ka o awh.

⁶ Hmonae thungvah, angnae awmseh telah kâ ka poe e Cathut ni Jisuh Khrih minhmai ka ang e Cathut bawilennae hah, panue thai nahane raeng poe hanelah, maimae lungthin dawk a ang sak toe.

Talai hlaam thung hro e hno

⁷ Hateiteh, a thaonae hno sakthainae teh, maimae nahoeh. Cathut amae lah ao dawkvah, a bahu a kamnue sak. Hote hno teh talai hlaam thung a ta teh maimouh dawk ao.

⁸ Maimanaw teh avoivang lahoi na ka tarawak nakunghai, thayoun aw hoh. Kângairunae lah kaawm nakunghai, lungpout aw hoh.

⁹ Rektapnae kâhmo nakunghai, hnoun e lah awm aw hoh. Rahim lah pabonae kâhmo nakunghai, poutnae koe phat aw hoh.

¹⁰ Bawipa Jisuh Khrih teh a hring tie heh, maimae tak dawkvah a kamnue sak hanelah, Khrih e duenae teh pout laipalah maimae tak dawk sin awh.

¹¹ Bangkongtetpawiteh, Khrih hringnae teh, maimae tak dawk kamnue thai nahanelah, Jisuh kecu dawk maimouh kahring e naw heh duenae kut dawk pout laipalah, poe e lah o awh.

¹² Hatdawkvah, duenae ni maimouh dawkhaw a tawkhaw teh, hringnae ni nangmouh dawkhaw a tawkhaw.

¹³ Ka yuem dawkvah, ka pâpho telah thut e patetlah yuemnae hoi ka kâkuen e Muitha hah maimouh ni tawn awh teh, maimouh hai yuem dawkvah pâpho awh.

¹⁴ Bangkongtetpawiteh, Jisuh ka thaw sak e Cathut ni maimouh hai Jisuh hoi rei na thaw sak teh, nangmouh hoi cungtalah a hmalah na thokhai han tie panue awh.

¹⁵ Hno cawngca pueng teh, nangmouh hane doeh. Hethateh, ahnimanaw koe, lungmanae hoe a pung teh Cathut e bawilenna kamnuesak nahanelah lunghawilawkdinae teh hoe a kuep.

¹⁶ Hatdawkvah, kaimouh teh lungpout awh hoeh. Kaimae a lawi lae tami teh, ka kumcathuk nakunghai, thung lae tami teh hnin touh hnukkhu hnin touh sak katha e lah pou ao.

¹⁷ Bangkongtetpawiteh, maimouh ni dongdeng rucatnae khangnae naw ni maimouh hanlah a yungyoe bawilenna lah ao sak.

¹⁸ Hatdawkvah, maimouh teh hmu thai e hno khen awh hoeh. Hmu thai hoeh e hnonaw doeh khet awh. Bangkongtetpawiteh hmuthai

e hnonaw teh dongdeng ca hanelah ao teh, hmuthaihoehe hnonaw teh a yungyoe a kangning.

5

Due hnukkhu kâhmo hane

¹ Rim lah kaawm e maimae talai im a ro toreih teh, kalvannaw dawk tami kut hoi sak hoeh e, Cathut ni a sak e yungyoe im ao tie hah panue awh.

² Maimanaw ni talai im dawk o awh nateh, kalvan im dawk pha hanlah cingou awh.

³ Hote hmuen koe pha awh toteh, hmuen tawn laipalah awm a mahoe.

⁴ Het talai rim dawk o awh navah, hnokari phu hoi cingou awh. Hottelah cingounae teh, hote rim hah ceitakhai han ngai dawk nahoe. Kadout thai e tak heh hringnae koe pha hane hoi kangning e dawk kâen hane ngai dawk doeh.

⁵ Hettelah, na ka rakueng pouh e Bawi teh Kathoung Muitha hah lawkawm lah na ka poe e Cathut doeh.

⁶ Hatdawkvah, maimouh teh pout laipalah yuemnae tawn awh. Hete tak dawk o awh lahun nah Bawipa hoi kâhla awh tie panue awh.

⁷ Bangkongtetpawiteh, maimouh teh mithmu e hno tho laipalah, yuemnae lahoi doeh hring awh.

⁸ Maimouh teh yuem awh toung dawkvah, tak hoi kampek vaiteh Bawipa hoi rei o hanlah hoe ngai awh.

⁹ Hatdawkvah maimouh teh takthai dawk o awh nakunghai, kâhla awh nakunghai, Bawipa ni a ngai e tami lah o awh nahanlah panki awh.

¹⁰ Bangkongtetpawiteh, tak dawkh thoe hawi sak e pueng hmu awh nahanelah, maimouh pueng teh Khrih e lawkcengnae tungkhung hma lah koungh kamnue awh han.

¹¹ Hatdawkvah, Cathut takinae teh panue awh dawkvah taminaw hah pâhlawp awh. Maimae kong teh Cathut hmalah a kamnue toungh dawkvah, nangmae lungthin haiyah a kamnue toe telah ka ngai hawi.

¹² Kaimouh teh kamamouh hoi kamamouh hmalah kâoup awh e nahoe h. Hatei, lungthin khih laipalah, alawilae meilam dueng khih hoi kâoup e taminaw e lawk hah nangmouh ni bout na pathung awh thai nahanlah kaimouh hoi kâkuen lah kâoupnae hmu awh nahanlah doeh nangmouh na poe awh.

¹³ Bangkongtetpawiteh tamipathu lah ka onae teh Cathut hane doeh. Tami lungkaang lah kaawm awh pawiteh nangmouh hane doeh.

¹⁴ Bangkongtetpawiteh, Khrih e a lungpatawnae ni maimouh teh muen na kayo awh. Tami buet touh ni tami pueng hanelah dout pawiteh tami pueng hai a due a van toe.

¹⁵ Hottelah tami pueng hane Bawipa ni a duenae teh, kahring e naw ni ma hanelah hring toungh laipalah, ahnimouh hanelah kadout ni teh bout ka thaw e Bawipa hanelah a hring awh nahane doeh.

Bout kâmaihawinae

¹⁶ Hatdawkvah atu hoi teh, apihai takthai koe lahoi panuek awh hoe h toe. Maimouh ni Khrih hah takthai koe lahoi hmaloe panue awh

nakunghai atuvah hottelah panuenae awmhoe
toe.

¹⁷ Hatdawkvah apipatet hai Khrih thung awm pawiteh sak katha e lah ao. Hno karuem pueng a kahma teh hnocawngca pueng teh a katha toe.

¹⁸ Hetnaw pueng teh Cathut koehoi e doeh. Cathut ni Jisuh Khrih lahoi maimanaw teh ama hoi bout na kâmaihawinae sak awh toe. Hote bout kâmaihawinae thaw hah maimouh koe na poe awh.

¹⁹ Hote kamthang teh Cathut ni Khrih thung ao teh, talaivan e yon hah pâkuem pouh hoeh toe. Taran a roum sak teh, ama hoi bout na kâmaihawinae sak toe. Hote bout kâmaihawinae hah maimouh koe na poe awh.

²⁰ Hatdawkvah, maimouh teh Khrih e laicei lah o awh. Cathut hoi bout kâmaihawi awh leih titeh Khrih yueng lah kaimouh ni na hroecoe awh.

²¹ Bangkongtetpawiteh, Cathut ni yon ka tawn hoeh e hah maimouh hane kecu dawk yon ka tawn e lah ao sak. Hot hateh, maimouh pueng ni Khrih lahoi Cathut e lannae koe pha thai nahane doeh.

6

¹ Kaimouh teh Cathut hoi thaw ka tawk e lah ka o a awh dawkvah, Cathut e lungpatawnae aphu kaawm hoeh lah na o sak awh hoeh nahanlah na thaisak awh.

² Bangkongtetpawiteh, kai ka ngainae tueng dawkvah, na lawk na thai pouh toe. Rungngangnae hnin nah na kabawp teh na rungngang toe telah Bawipa ni ati. Kenhaw! atu doeh ngai kaawm e tueng toe. Atu raw doeh rungngangnae hnin toe.

Pawl thaw tawknae koe kâhmo e

³ Kaimouh ni a thaw tawknae koe ayâ ni a toun hoeh nahan, ayânaw koe tarawknae ka sak awh hoeh.

⁴ Rektapnae, roedengnae, hlout thai hoeh e runae hoi kâhmonae,

⁵ hemnae, thongim bonae, ruengruengtinae, yonpennae, ihmuhnapahlanae, kahaionae,

⁶ lungthoungnae, lungangnae, lungsawnae, hawinae, Kathoung Muitha coenae, kâsak laipalah atangcalah lungpatawnae,

⁷ Lawkkatang pâphonae, Cathut e bahu kam-nue saknae, lannae puengcang avoilah aranglah kâmahrawknae,

⁸ barinae hoi barihoehnae, oupnae hoi pathoe-nae, dумыen e patetlah kaawm ei nakunghai hmantang e tami,

⁹ Apinihai panue hoeh e patetlah kaawm ei nakunghai min kamthang e tami, thei e patetlah kaawm ei nakunghai kahring e tami, yue e patetlah kaawm ei nakunghai theinae hoi kahlout e tami,

¹⁰ a lung ka mathout e patetlah kaawm nakunghai a lung pou kahawi e tami, ka roedeng e patetlah kaawm ei nakunghai tami moikapap ka bawi sak e tami, bangcahai ka tawn hoeh e patetlah kaawm ei nakunghai a cawngca ka tawn e tami lah ka o dawkvah, Cathut ni na ta e a thaw katawkkung katang lah ka o tie hah bangpueng dawk kamcengcalah kamnue sak awh.

¹¹ Kawrin kho kaawm e hmaunawngghanaw kaimae pahni teh nangmouh hanlah a kamawng toe. Kaimae lungthin hai sut a kamawng toe.

¹² Kaimouh dawk na khawk awh hoeh. Nangmae lung dawk doeh na khawk awh.

¹³ Hatdawkvah na pathungnae lahoi nangmae lungthin ka kaw lah paawng awh, telah ka canaw koe lawk ka dei pouh e patetlah na dei pouh.

Kânging hoeh e Yawcu

¹⁴ Kayuemhoehnaw hoi cungtalâh kânging hoeh e yawcu hrawm awh hanh. Lannae hoi kamsoumhoeh hah bangtelamaw a hmawng thai han vaw. Angnae teh hmonae hoi bangtelamaw reirei ao thai han vaw.

¹⁵ Khrih hoi Belial teh bangtelamaw lungkânging thai han vaw. Kayuem hoi ka yuem hoeh ni bangmaw cungtalâh a coe han vaw.

¹⁶ Cathut bawkim hoi meikaphawknaw teh bangtelamaw khuet a kâkuet han vaw. Cathut ni a dei e teh ahnimouh koe ka o han. Ahnimae Cathut lah ka o han. Ahnimouh hai kaie tami lah ao a han ati e patetlah nangmouh teh kahring Cathut e bawkim lah na o awh.

¹⁷ Hatdawkvah ahnimouh thung hoi tâcawt awh nateh, aloukcalah awm awh, telah Cathut ni ati. Ka khin e hnonaw hah na kut hoi boehai tek awh hanh. Hottelah na tetpawiteh nangmouh kai ni na dâw awh han.

¹⁸ Kai teh nangmae Pa lah ka o vaiteh, nangmouh hai Kaie canu capa lah na o awh han telah Athakasaipoung e Bawipa ni ati.

7

¹ Ka pahren e naw, maimouh koe het patetlah lawkkamnae ao dawkvah, takthai hoi lungthin dawk khinnae pueng teh mahoima kâcai sak

vaiteh, Cathut taki laihoi thoungnae hoi kawi a sei.

Kayuemnaw koe Pawl a lunghawinae

² Kaimanaw na dâw a loe. Kaimouh ni api koehai ka payon awh hoeh. Apipatethai ka rawk sak awh hoeh. Api koehai huenghai hoi ka cat awh hoeh.

³ Nangmanaw yon na pen ngai daw k hettelah ka dei e nahoe. Bangkoktetpawiteh ka dei tangcoun g patetlah nangmouh hoi rei hring hane hoi due hanelah ngainae totouh kaimouh ni nangmouh lung na pataw awh.

⁴ Kai ni nangmanaw hah na yuem awh dawkvah nangmouh kecu daw k ka kâoup. Kai teh lungpahawinae ka coe dawkvah kaimouh ni ka khangnae rucatnae pueng daw k lunghawinae hoi ka kawi.

⁵ Masidonia ram ka pha navah kâhat nahan tueng kahmawt laipalah alawilah kâtuknae, a thung lah takinae ao teh a voivang hoi rektapnae ka khang awh.

⁶ Hatei, a thakayounnaw lung ka pahawikung, Cathut ni Titu a tho e lahoi kaimanaw lung na pahawi awh.

⁷ Titu a tho e daw k hoi dueng lungpahawi e nahoe. Titu ni nangmouh koehoi a coe e lungpahawinae lahoi lung na pahawi awh. Alouke lahoi dei pawiteh, nangmouh ni na rabui awh e, na lungmathoe awh e, hoi kai koe pahrennae na tawn awh e naw hah Titu ni na dei pouh dawkvah ka ko a nawm.

⁸ Ka thut e ca ni nangmouh, lungmathoenae na kapoekung lah kaawm nakunghai thoseh ka

lung mathout hoeh. Hote ca teh, nangmouh koe dongdeng lung ka mathout sak nakunghai atuteh lunghawinae bout ka tawn toe.

⁹ Kai ni na patawn e ca ni nangmouh lung na mathoe sak eiteh lunghawihoeahnae ka tawn hoeh. Hote ca ni nangmouh dongdeng lung na mathoe sak awh e hah ka hmu navah ka lunghawi hoeh. Hatei nakunghai, atu ka lung ahawi. Hottelah ka ti navah nangmouh na lungmathoe sak dawkvah ka lunghawi e nahoe. Nangmae lungmathoenae ni nangmouh pan na ka ngai sak dawk doeh. Atangcalah nangmouh teh Cathut ngainae patetlah na lungmathoe awh dawkvah, kaimouh kecu dawk bangcahai na sung awh hoeh.

¹⁰ Bangkongtetpawiteh, Cathutlae lahoi khang e lungmathoenae ni teh rawkphai koe lah awm sak laipalah rungngangnae hmu nahan koe lah pan na kângainae lah doeh ao. Talaivan lungmathoenae teh duenae ka tâcawtkhai e lah ao.

¹¹ Kenhaw! Cathutlae lahoi lungmathoenae ni nangmouh thungvah hoe tawknae, caisaknae, khang thaihoeahnae, takinae dounnae, lungthawngnae a tâcokhai. Hahoi, kamsoum lah lawkcengnae kong naw dawk hoi yon thoung nahanelah hno puengpa dawk na hringnae kamnue sak awh toe.

¹² Hottelah, kai ni nangmouh koe ka thut e ca teh yonnae ka sak e tami hanelah nahoe, yon ka khang e hai nahoe, maimae lathueng nangmae lung thahmeinae naw hah Cathut hmalah namamouh ni roeroe na hmu hanelah doeh ka thut.

¹³ Hatdawkvah maimouh teh lungpahawinae coe awh. Maimae lungpahawinae coe e Titu e a lungthin teh nangmouh abuemlah kecu dawkhawin hmu e lah ao teh ahnie lunghawinae dawkhawin hoi maimouh teh puenghoi konawm awh.

¹⁴ Kai ni nangmae kong hah Titu koevah kâoupkhai e yeirai awmhoeh. Bangkongtetpawiteh nangmouh koe kaimouh ni ka dei awh e naw pueng teh, lawkkatang lah ao dawkhawin, Titu kâoupkhai e naw hai atang e lah a onae a kamnue toe.

¹⁵ Titu ni nangmae lawk a ngâi teh nangmouh ni takinae hoi na dawn awh e heh pouk navah nangmanaw hah lung hoe na pataw awh.

¹⁶ Kai ni bangpueng dawkhawin nangmanaw na tang awh dawkhawin ka konawm.

8

Pasoumhno kuep sak nahanlah hroecoena

¹ Hmaunawngghanaw, Masidonia ram e Kawhmounnaw koe Cathut ni a poe e lungmanae hah nangmouh koe dei hanelah ka ngai.

² Ahnimouh teh roedengnae hoi puenghoi tanouknae a khang awh ei, ahnimae lunghawinae hoi roedengnae pueng teh, ahnimae pasoungamnae dawkhawin lah a coung sak.

³ Kai ni kampangkhai e teh, ahnimouh ni amamae a coung thai awh e hlak acawilah a poe awh teh,

⁴ tami kathoung kawkhik e lahoi coe hane yawhawinae hah ka coe awh van nahan, poehno hah na dâw pouh awh loe titeh na kâ awh.

⁵ Ahnimouh teh kaimouh ni ka ngaihawi e hloilah, Cathut ngainae patetlah Bawipa koe amamouh hoi amamouh hmaloe a ka poe, a hnukkhu kaimouh koehai a ka poe awh.

⁶ Hatdawkvah, Titu ni hote lungmanae hah nangmouh koe a kamtawng e patetlah a pout totouh a sak nahanlah kaimouh ni ahni hah ka hroecoe awh.

⁷ Nangmouh teh yuemnae dawkh hai thoseh, pâphonaeh dawkh hai thoseh, lungangnaeh dawkh hai thoseh, lungtangnaeh dawkh hai thoseh, kaimouh koe na tawn awh e nangmaeh lungpatawnaeh hai thoseh, bangpueng dawkh na kuepcing awh e patetlah hnokahawi saknaeh dawkh haiyah na kawi awh naseh.

⁸ Hottelah khet navah, kâpoelawkh lah ka dei e nahoe. Ayânaw e lungthonaeh hoayah nangmaeh lungpatawnaeh ka tanouknaeh doeh.

⁹ Bangkongtetpawiteh nangmouh teh, maimaeh Bawipa Jisuh Khrih e lungmanae heh panue awh. Bawipa teh a bawi ei ahnie roedeng e lahoi nangmouh na bawi awh nahanelah, nangmouh han roedengnaeh a khang.

¹⁰ Hete kahawi hno sak e hoi kâkuen lah, pouknaeh kahawi na poe han. Hete pouknaeh teh kaloum tangcoung e kum dawkh hoi hete hno kamtawng awh e lahoi tawkh hanelah lungthonaeh ka tawn e nangmouh hanlah aphu ao.

¹¹ Nangmouh ni lungthonaeh hmaloe na tawn awh e patetlah atu hoi namamouh na coung thai awh e patetlah tawksak a nateh hete thaw hah abaw totouh tawkh awh.

¹² Bangkongtetpawiteh, lungthonae awm pawiteh, kaawm hoeh e hno khien laipalah, kaawm hno dawkh hoi ngai hane kawilah ao.

¹³ Hete a kong dawkh hoi alouknaw bet ahawisak vaiteh nangmouh runae poe hane na hoeh. Reikâvan lah sak hane doeh.

¹⁴ Atu tueng dawkh nangmae tawnnae hah ahnimaepankinae koe na poe awh pawiteh ahnimaetawnnae hoi nangmaepankinae koe thap e lah kaawm van han.

¹⁵ Hatnavah, kapap lah ka hmawt e haiyah cawihoe. Kayoun lah ka hmawt e hai vout hoeh telah Cakathoung dawkh thut e patetlah sue kâvan lah ao han.

Pasoumhno hnonae

¹⁶ Nangmaelathueng kaie lungthonae teh Titulungthin dawkh kaawm sak e Cathut teh ka pholen.

¹⁷ Titu teh kaimae thapoenae lawk a ngaihloilah ama lungthonae hoe a tawn dawkhvah nangmouh koe ka tho e lah ao.

¹⁸ Titu hoi hmaunawngah buet touh teh kaimouh ni ka patoun awh. Ahni ni kahawie kamthang a hramkhai navah kawhmounnawpueng koehoi pholen e tami lah ao hloi lah,

¹⁹ Cathut amae bawilennae hoi kaimae lungthonae hah kamnue sak thai nahanlah thoseh, kaimouh hoi thaw ka tawkh e hete poehnonaw hah, kaimouh hoi cungtalah cei sak hanelah, Kawhmounnaw ni na rawi awh teh coungkacoe lah ka o awh.

²⁰ Kaimouh ni hote poehno moikapap daw, tounnae awm laipalah, ayânaw koehoi pathoe-nae ao hoeh nahanlah ka kâhruetcueth awh.

²¹ Bangkongtetpawiteh, kaimouh teh, Bawipa e hmalah dueng tho laipalah, talai taminaw e hmalah hai bari kaawm e dueng doeh ka taw, awh.

²² Ahnimouh hoi cungalalah, kaimae alouke hmaunawngaha buet touh ka patoun awh. Kaimouh ni ahni teh atuhoitu noumcai hnukkhu hno puengpa daw, a lungthahmei e tami lah a onae hah ka hmu awh. Ahni teh, nangmae lathueng yuemkamcu lah ao dawkvah, atu hai hoe lungtho e lah ao.

²³ Titu hoi kâkuen lah dei pawiteh ahni heh kaie ka hui lah ao teh nangmouh hanelah kai hoi cungalalah thaw ka taw, e lah ao. Maimae hui, hmaunawngahanaw hoi kâkuen lah dei pawiteh ahnimouh teh kawhmoun e patounenaw, Khrih bawilennaeh lah kaawm e lah na o awh.

²⁴ Hatdawkvah nangmae pahren lungmanae hoi nangmae kong daw, kaimouh ni kâoupkhai hane kongnaw hah kawhmounnaw e hmalah hoi ahnimouh koe kamnuek sak awh.

9

Pasoung hanlah hroecoenae

¹ Tami kathoungnaw kawkhiknae hoi kâkuen lah, kai ni nangmouh ca na patawn awh hanelah ngai hoeh toe.

² Bangkongtetpawiteh, nangmae lungthonae teh ka panue. Hote lungthonae dawkvah Masi-donia ram kaawm e hoi Akhaia ram e naw

koe coungkacoe a ta toe tie nangmae kong hah kâoupkhai awh. Hatdawkvah nangmae na lungthin thahmeinae ni na tahrue awh.

³ Hatdawkvah hete kong hoi kâkuen lah, nangmouh koe kai ni kâoupkhai e teh, ayawmlah awm laipalah kai ni ka dei e patetlah nangmanaw coungkacoe na kâhruetcueth awh nahanlah hmaunawngghanaw hah ka patoun.

⁴ Telah nahoe h pawiteh, Masidonia taminaw nangmouh koe ka thokhai navah, nangmouh ni banghai na hrueng awh hoehpawiteh, kaimouh ni yo ka kâoupkhai awh tangcoung e hah kaya ka tho han doeh.

⁵ Hatdawkvah, nangmouh ni na poe awh e poehno hah ngangngang cawng e patetlah tho laipalah, lungthocalah hoi poe e hno lah coungkacoe ao nahan, hmaunawngghanaw ni nangmouh koe hmaloe a thao awh vaiteh, hote poehno hah hmaloe kuep sak hanelah, kai ni na hroecoe awh laipalah o kawi nahoe telah ka pouk.

Cati tunae

⁶ Cati younca ka tu e ni younca a a han, moikapap ka tu ni moikapap a a han tie hah panuek awh.

⁷ Tami pueng ni amahmawk pasoung naseh. Paawtnae lungthin hoi pasoung awh hanh. Poe laipalah awm mahoe tie lungthin hoi pasoung awh hanh. Lungthonae lahoi ka pasoung e dueng doeh Cathut ni a ngai.

⁸ Cakathoung ni a dei e patetlah ahni teh a pasoung toe. Karoedengnaw hai a poe toe.

⁹ Ahnie a lannae teh a yungyoe a cak, het hateh, Ahni ni karoedengnaw hanelah poehno a pasoung toe. A lannae teh a yungyoe kangning ati e Cakathoung daw k a thut e patetlah lah doeh ao.

¹⁰ Cati ka patûenaw teh a patûe e patetlah rawcarawnei kapoekung ni ahnimouh hane cati a poe vaiteh a pungdaw sak han. Nangmae na lannae haiyah a pungdaw sak vaiteh a paw a paw sak han.

¹¹ Hottelah nangmouh teh lungthocalah hoi, a cawngca na pasoung awh nahanelah a cawngca daw k na tawnta awh dawkvah, maimouh daw k hoi Cathut e lungmanae teh lunghawilaw k dei hanelah ao.

¹² Bangkongtetpawiteh, tami kathoungnaw kabawpnae ni ahnimouh hanlah yawhawinae lah ao hloilah Cathut koe lunghawilaw kdeinae a pungdaw sak.

¹³ Nangmouh teh Khrih kamthang kahawi na hringkhai awh e thoseh, tami kathoungnaw hoi alouke taminaw pueng hai barilawanae na poe awh e thoseh, ahnimouh ni a pouk awh toteh hete khetyawtnae khetsin lahoi Cathut a pholen awh han.

¹⁴ Hothloilah nangmouh lathueng ka phat e Cathut e ka talue e lungmanae kecu daw k ahnimouh ni na rabui awh vaiteh na ratoum pouh awh han.

¹⁵ Deilekhoeh e poehno kecu daw kvah Cathut teh pholen lah awm lawiseh.

Guncei Pawl kâawwnnae

¹ Nangmouh hoi rei o nateh banghai na dei ngam awh hoehe, ahlanae koehoi taran kahawi na ti awh e kai Pawl ni Khrih e lungdo lungnemnae lahoi na thaisak awh.

² Nangmouh koe ka pha awh navah, talai ngainae patetlah o hoehe nahan na kâ awh. Bangkongtetpawiteh, talai ngainae patetlah ao ati e a kamnue hoehe nahan lah.

³ Kaimouh ni kâtuk nah ka hno e puengcang teh talai tak ngainae dawke hoi ka tuk e lah tho hoehe.

⁴ Kaimouh ni kâtuknae koe ka hno awh e senehmaica teh takthai na hoehe. Cathut e thaonae dawke hoi kho rapanimnaw ka raphoe thai e senehmaica doeh.

⁵ Hote senehmaica hoiyah taminaw e pouknae, Cathut panuenae kangangkung kâoupnae pueng a raphoe teh, a cawngca e lungpouknae pueng hah a man a katek teh, Khrih lawk a ngâi sak awh.

⁶ Nangmouh ni lawk na ngâi awh toteh, lawk ka ngâi hoehe e naw pueng teh hmantang vah lawkceng hanelah coungkacoe lah ka o.

⁷ Nangmouh ni hnopai pueng a vanlong doeh na khet awh. Apinihai mahoima Khrih dawke ka o tie na yuem pawiteh ahni ni Khrih dawke ao e patetlah ahnimouh ni Khrih dawke onae hah bout pouk hanlah a ngâi.

⁸ Bangkongtetpawiteh, nangmanaw hah raphoe hanelah tho laipalah rounge sak hanelah Bawipa ni na poe e kâawwnnae a kong dawke, kâoup payon nakunghai kayak mahoehe.

⁹ Kai ni nangmouh ca na patawn e teh pakhi-nae lah pouk sak hane na ngaikhai hoeh.

¹⁰ Bangkongtetpawiteh, Pawl e canaw teh ari teh bahu a tawn ei, ama kâhmo awh toteh a tha kayoun e hoi a pâpho e hai banghai bari hane kawi awmhoeh ka tet e tami na o awh.

¹¹ Hottelah ka dei e naw ni lamhla hoi ka thut e ca hoi nangmouh koe ka o nah ka tawk ka sak hane heh banghai kâvaihoehnae awmhoeh tie hah panuek naseh.

¹² Bangkongtetpawiteh, kaimouh teh ahni-mouh hoi ka bangnue ngam awh hoeh. Ahni-mouh teh buet touh hoi buet touh a ka bangnue awh teh, ka pathu e lah ao awh.

¹³ Kaimouh teh kamamae coungnae hloilah ka pholen awh hoeh. Cathut ni na hmoun pouh e a thaw dawk dueng doeh kâoup awh. Hote thaw teh nangmouh koe totouh ka tawk awh.

¹⁴ Nangmouh koe totouh phat hoehpawiteh, kaimouh ni ka tapuet lah ka sak awh hoeh. Bangkongtetpawiteh, Khrih kamthang dei laihoi nangmouh koe totouh ka pha awh toe.

¹⁵ Hatdawkvah Cathut ni na hmoun pouh e thaw hloilah tami alouknaw ni a tawk e thaw hah ka noe awh hoeh. Kaimouh ka ngaihawi e teh na yuemnae a rounng vaiteh Cathut ni na hmoun pouh e khori thungvah hoe ka kaw lah thaw tawk han tie hah doeh.

¹⁶ Nangmae ram hloilah kamthang kahawi ka dei hanelah ka ngaihawi awh. Ayânaw ni a tawk tangcoungnae hmuen koe kaimouh ni ka kâoup awh hoeh.

¹⁷ Hatdawkvah kâoup han ka ngai e tami teh

Cathut dawk kâoup naseh.

¹⁸ Bangkongtetpawiteh, yuemkamcu e tami teh amahoima kâatalue e tami nahoe, Cathut ni a lungkuep e tami hah doeh.

11

Guncei kaphawknaw

¹ Kaie pathunae hah dongdeng na panguep awh nahanlah na ngaikhai awh. Dongdeng na panguep awh haw.

² Cathutlae dipmasin e patetlah nangmouh hanelah ka dipma. Nangmouh teh kathounge tanglakacuem patetlah Khrih koe poe hanlah, hote buet touh dueng e vâ koe na ham sak toe.

³ Tahrin ni amae huengo e lahoi Evi a dumyen e patetlah Khrih lung na patawnae lungthin yout na kâhat awh langvaih tie ka tâsue.

⁴ Nangmanaw koe ka tho e taminaw ni kaimouh ni ka pâpho awh hoe, e alouke Jisuh kong a dei awh nakunghai thoseh, nangmouh ni na coe awh hoe rae muitha a coe awh nakunghai thoseh, na thai boi awh hoe rae kamthang na thai awh nakunghai thoseh, ahni hah panguep hanlah ao.

⁵ Kai teh kalenpounge gunceinaw hlak bet ka rahnoum hoe mue ka ti.

⁶ Lawk deinae koelah kathoumhoeh nakunghai thouthainae koe lah ka rahnoum hoe. Nangmouh koe bangpueng daw kakaipinlah kamnue sak toe.

⁷ Nangmouh ni na oup awh nahanlah ka ka rahnoum teh, Cathut e kamthang kahawi hah

nangmouh koe ayawmlah pâpho e lahoi ka payonpakai e o maw.

⁸ Nangmae thaw ka tawk hanelah alouke kawhmounnaw koehoi kutphu hei laihoi nangmouh na lawp a maw.

⁹ Nangmouh hoi rei o teh buet buet touh ka panki nah apihai ka tarawk hoehe. Bangkongtetpawiteh, Masidonia ram lahoi ka tho e hmaunawngghanaw ni ka panki e naw na poe awh. Nangmouh tarawk laipalah doeh ka o. Hmalah haiyah poe ka kâhruetcuethan.

¹⁰ Khrih e a lawkkatang kai thung ao e patetlah Akhaia ram dawkvah, hettelah kai ka kâoupkhai e heh apinihai cakâ thai hoehe.

¹¹ Bangkongtetpawiteh, kai ni nangmouh lung na pataw hoehe dawke maw. Nangmouh kai ni lungpataw e hah Cathut ni a panue.

¹² Kâoup han kangainaw ni a kâoup awh hoehe nahanelah, kâoupnaw ni hai kai patetlah hmantang a sak awh nahanelah, ka sak tangcoung e patetlah pou ka sak han rah.

¹³ Bangkongtetpawiteh, ahnimanaw teh guncei kaphawknaw doeh. Khrih e guncei patetlah a kâsak awh teh, dumyennae thaw katawknaw lah ao awh.

¹⁴ Hetheh kângairukhai hane na hoehe, Setan patenghai ka ang e kalvantami boiboe lah a kâsak.

¹⁵ Hat pawiteh, ahnimae sayanaw hai lannae kamthang ka pâpho e lah kâsak pawiteh, bangmouh dei han kaawm. Ahnimouh teh amamouh ni a tawke awh e patetlah a hnukteng e hnin navah a tawke e patetlah a khang awh han doeh.

Khrih hanlah Pawl ni a khangnae

¹⁶ Kai ni bout ka dei e teh, apinihai tamipathu tet hanh naseh. Kai kâoupnae younca ao thai nahan, tamipathu patetlah na pouk awh nateh panguep awh.

¹⁷ Hettelah kai ni ka dei e lawk heh Bawipa ni a dei e patetlah ka dei e nahoe. Ka pathu e patetlah taranhawi laihoi kâoup teh ka dei e doeh.

¹⁸ Tami pueng ni teh talai ngainae daw k kâoupkâpawi dawkvah kai haiyah kâoupkâpawi van e doeh.

¹⁹ Nangmouh teh na lungang awh dawkvah, tamipathunaw hah lunghawicalah na panguep thai awh.

²⁰ Ayânaw ni nangmanaw pueng san lah na ta awh, na yo awh, hnopai na lawp awh, na yue awh, na tambei awh navah, na panguep awh.

²¹ Kai teh hot patetlah ka taw k sak hoe h nahanlah ka tha a youn tangngak. Hatei tami buetbuet touh ni hno buetbuet touh daw k kâoupkhai pawiteh, kai hai kâoupkhai van han telah kapathunaw e patetlah ka dei.

²² Ahnimanaw teh Hebru tami namaw. Kai hai doeh. Isarel taminaw maw. Kai hai doeh. Abraham catounnaw maw. Kai hai doeh.

²³ Khrih e a san maw, ahnimanaw hlak vah kai teh ka taluehnawn lah ka o telah ka pathu e patetlah hoi ka dei. Ahnimanaw hlak hoe ka panki teh, avai moikapap thongim na pabo awh, moikapap na hem awh, due han totouh khangnae atuhoitu ka kâhmo.

²⁴ Judahnaw kut daw k hoi avai 40 vaitouh vout hemnae vai panga touh ka khang toe.

²⁵ Ruitaboung hoi vai thum touh na hem awh. Talung hoi vai touh na dêi awh. Long vai thum touh a kamko teh tui van hnin touh hoi rum touh ka o.

²⁶ Kahlong voutsout ka ceinae koe tuipui rakanae koehoi runae, dingcanaw koehoi runae, ka miphunnaw koehoi runae, Jentelnaw koehoi runae, kho thung kâhmo e runae, kahrawngum kâhmo e runae, tuipui dawk kâhmo e runae, hmaunawngaha lah ka kâsaknaw koehoi runae, het patetlah e runae naw ka ka hmo.

²⁷ Thapatungnae hoi patangnae, atuhoitu ihmuhnapahlanae, kahaikahlam lah onae, pâding ni karuemnae, caicinae hai ka kâhmo.

²⁸ Hote runae hloilah kawhmounnaw hanelah lungpuennaen ni hai hnintangkuem na ratet.

²⁹ Ayânaw a thayoun navah ka thayoun laipalah ka o thai han maw. Ayânaw a payon-pakai navah ka lungpuen laipalah ka o thai han namaw.

³⁰ Kai ni kâoup pawiteh kama e ka thayounnae dawk ka kâoup han.

³¹ Kai teh laithoe ka dei hoeh tie teh Bawipa Jisuh Khrih e napa, a yungyoe yawhawinae katawnkung, Cathut ni a panue doeh.

³² Damaskas kho kaawm e siangpahrang Aretas kut rahim kaawm e khobawi ni kai na man sak hanlah a kâcai navah, longkha khoup a khan awh.

³³ Khobawi e kut dawk hoi hlout thai nahanlah, a hnukkâbangnaw ni tapawm thung na ta awh teh kho thung hoi rapan alawilah na pabo awh teh, na yawng sak awh.

12

Lungmanae teh a khout

¹ Kâoup e heh kai hanlah meknae awmhoeh. Hateiteh, Bawipa ni vision na patue e heh bout ka dei ei nei.

² Hnuk lae kum hlaipali touh nah, Khrih thung kaawm e tami buet touh teh, kalvan dot thum e dawk tawm lah ao e hah ka panue. Hatnavah ahni dawk tak hoi maw, tak laipa maw tie teh ka panuek hoeh.

³ Cathut ni a panue. Ahni teh paradis totouh tawm lah ao teh, tami ni a dei kawi hoeh e lawk, a thaithai hoeh e lawk hah a thai e hah ka panue.

⁴ Hatnavah ahni dawk takthai hoi maw, a takthai hoi nahoehmaw tie teh ka panuek hoeh. Cathut ni a panue.

⁵ Hot patet e tami hah ka kâoupkhai han. Hatei, kai dawk teh, ka thayounnae hloilah kâoupkhai hane awmhoeh.

⁶ Kai teh kâoup han ka ngai nakunghai, lawkkatang dueng dei hanlah ao dawkvah, ka pathu e nahoe. Hatei, apipatet ni hai kai na hmu e hlah, kaie kamthang a thai e hlah, kai dawk na pouk payon awh hoeh nahanelah, kâoup laipalah ka o han.

⁷ Kai ni ka hmu e vision teh a lentoe poungh dawkvah, ka kâoup hoeh nahanlah ka thung vah Setan e patoune lah kaawm e, ka tak dawk na ka ruk hanelah pâkhing hah na poe.

⁸ Hote reithainae dawk hoi kahlout nahanelah Bawipa koe vai thum touh ka ratoum.

⁹ Hatei, Bawipa ni kaie lungmanae teh nang hanelah a khout. Bangkongtetpawiteh, kaie

thaonae teh thayounnae dawkvah ouk a kuep sak telah a dei. Hatdawkvah, Khrih e bahu teh kai dawkvah pou ao thai nahanelah, kai teh ka thayounnae dawkvah lunghawi laihoi hoe ka kâoupkhai han.

¹⁰ Hatdawkvah Khrih kecu dawk ka khang e katha ohoeahnae, dudamnae, rucatnae, ka pacek-pahleknae, hoi het patet e khangnae hah ka ngai. Bangkongtetpawiteh, kai ka tha ayoun nah bahu hoi na kawi sak.

Guncei noutnae

¹¹ Kai teh tamipathu lah ka o toe. Nangmouh ni kai teh khak katek e lah na o sak awh. Atanglah kai teh nangmouh ni na oup awh hanlah ao. Bangkongtetpawiteh, kai teh banglahai kaawm hoeh nakunghai gunceinaw hlak hoe ka rah-noum hoeh.

¹² Atangcalah kaie guncei lah ka onae mitnout-naw teh, kângairunae hoi thaonae hah doeh.

¹³ Kai teh nangmouh hanelah hnokari lah ka o hoeh e hloilah, nangmouh koe alouke kawh-mounnaw hlak hoe rahnoum nahane bangcahai ao maw. Hot patet e dawk teh na ngaithoum awh loe.

Kawrinnaw Pawl ni tuehmuenae

¹⁴ Atu nangmouh koe, avai pâthumnae tho hane coungkacoe ka o. Hatei, nangmouh tarawk hanelah pouknae awmhoeh. Nangmae hnopai ka ngai e nahoe. Namamouh doeh na ngai awh. Canaw ni manu na pa hanlah hnopai pâkhueng e na hoeh. Manu na pa ni doeh canaw hanlah pâkhueng e lah ao.

15 Kai ni nangmae lungthin muitha hanlah lunghawicalah hoi kama e hno hah ka hno teh kama e tak hai abuemlah ka hno han. Namamouh dawk kai ni lungpatawnae kampung pawiteh, nangmouh ni kai dawk lungpatawnae a kamyawt han maw.

16 Kai teh nangmouh hanlah hnokari lah kaawm ei nakunghai, arulahoi nangmouh koe-hoi a dâw toe na tet awh pawiteh,

17 arulahoi nangmouh koe tami ka patoun e naw koehoi nangmae hno hah ouk ka la boimaw.

18 Kai ni Titu hah nangmouh koe a tho hanelah ka hroecoe nah, ahni hoi cungtalah alouke hmaunawngaha buet touh ka patoun. Titu ni nangmouh koe dumpyennae lahoi nangmae hno a la maw. Kaimouh teh lungkânging lahoi thaw ka tawk awh hoehe maw. Lam buet touh dawka ka dawn awh hoehe maw.

19 Kaimanaw ni nangmouh hmalah mahoima yon hlout nahanlah lawk a dei awh telah na pouk awh na maw. Kaimouh teh Khrih thung hoi Cathut hmalah doeh lawk ka dei awh. Pahren e ka huikonaw, ka tawk e hnonaw heh nangmouh roungh nahane doeh.

20 Ka tho torei teh, nangmouh heh kai ni hmunghaihoehenaw, kai hai nangmouh ni na hmunghaihoehe lah o han tie hoi, nangmouh dawka kâyuenae, kâtânae, lungkhueknae, kâounnae, kaya saknae, tamcuk lawk deinae, kâoup kâpawinae, buet touh hoi buet touh kâtoenaeh lah o han tie hoi,

21 yampa vah yon awh teh kamhnawngnae, kamsoumhoehe napui tongpa yonnae, houn-

lounnae sakpayon teh, sahnin ditouh pankângai
hoeh naw kecu dawk cingou awh teh, nangmouh
hmalah Cathut ni kai hah na ka rahnoum sak han
tie hah tâsuenae ao.

13

Hnukteng kâhruetcuetha poenae

¹ Atu apâthum lah nangmouh koe ka tho han.
Cakathoung ni a dei e patetlah, yon kâhnei
navah, kapanuekkhaikung kahni kathum touh e
lawk hah caksak lah ao han.

² Yampouh yonnae na ka sak e naw hoi alouke
taminaw hai, apâhni ka tho navah ka dei e
patetlah bout ka tho pawiteh nangmouh buet
touh hai minhmai ka khen mahoe.

³ Bangkongtetpawiteh, Khrih ni kai dawk hoi
lawk a dei tie na panue awh nahane doeh.
Bawipa teh nangmouh koe a thayoun hoeh.
Nangmouh thungvah bahu hoi akawi.

⁴ Telah boipawiteh, Bawipa teh a thayounnae
lahoi thingpalam dawk a pathout awh nakung-
hai Cathut e bahu lahoi bout a hring. Hot
patetvanlah maimanaw haiyah Bawipa dawk
thayoun nakunghai, Cathut e bahu lahoi Bawipa
hoi hring awh han.

⁵ Nangmouh teh yuemnae dawk na o awh
maw, na awm awh hoeh maw tie hah na-
mamouh hoi namamouh akung kâkhei awh.
Nangmouh thung vah Jisuh Khrih ao tie hah
na panuek awh hoeh maw. Telah hoehpawiteh
tanouknae dawk ka sung e tami lah namaw, na
o awh toung hah vaw.

⁶ Kaimouh teh tanouknae dawkvah ka sung awh hoeh tie hah na panue a han ti teh ka ngaihawi.

⁷ Nangmanaw teh kahawihoehe bangcahai na sak awh hoeh nahanelah Cathut koe na ratoum pouh awh. Hottelah ka tinae teh tanouknae ka tâ awh toe tie kamnue sak nahanelah nahoe. Maimouh teh tanouknae dawka sung e patetlah o awh lahunnah vah nangmouh teh bari kaawm e na sak thai awh nahane doeh.

⁸ Maimouh teh lawkkatang khoeroe ngang thai awh hoeh. Lawkkatang koe lah kampang lah doeh kampangkhai thai awh.

⁹ Kaimouh katha ayoun teh nangmouh na tha a sai awh navah, kaimouh ka lunghawi awh. Nangmouh na kuep awh nahane doeh na ngaikhai awh.

¹⁰ Hatdawkvah raphoe nahane nahoe, sak nahanelah Bawipa ni na poe e kâtawnnae patetlah ka tho toteh rek han ka ngai hoeh dawkvah, atu nangmouh hoi ahlanae koe ka o lahunnah hettelah ca na patawn awh.

¹¹ Ahnoungepoung lah dei han ka ngai e teh, hmaunawngghanaw nangmouh koe yawhawinae awm lawiseh. Kuepnae hoi lunghawinae awm lawiseh. Lung buet touh lah awm awh nateh, kâponae hoi lungpatawnaeh lah kaawm e Cathut teh nangmouh koe cungtalah na okhai han.

¹² Buet touh hoi buet touh kathounge kâpaconae hoi kut kâman awh.

¹³ Tamikathoungepueng ni kut na man awh.

¹⁴ Bawipa Jisuh Khrih e lungmanae, Cathut e lungpatawnae hoi, Kathoung Muitha e kâhuikonae naw teh nangmouh pueng koe awm lawiseh. Amen.

Thai Phum Holy Bible

The Holy Bible in the Thaiphum Chin language of Myanmar

Copyright © 2020 Batupuei Christian Fellowship

Language: Thai Phum (Chin, Thaiphum)

Translation by: Batupuei Christian Fellowship

copyright only valid in Myanmar; Public Domain elsewhere

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

- You include the above copyright and source information.

- If you make any changes to the text, you must indicate that you did so in a way that makes it clear that the original licensor is not necessarily endorsing your changes.

- If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2024-05-01

PDF generated using Haiola and XeLaTeX on 19 Dec 2025 from source files dated 12 Dec 2025

84c7fe95-3b68-5ab6-b17e-a642d33ac078